



KEMENTERIAN PEMBANGUNAN WANITA,
KELUARGA DAN MASYARAKAT

KENYATAAN MEDIA

WANITA GIGABIT 2026: JPW PERKASA WANITA KUASAI EKONOMI DIGITAL DAN TEKNOLOGI

KUALA LUMPUR, 28 JULAI 2026 – Hari ini saya merasmikan program *Wanita Gig And Busines in Technology 2026* (Wanita Gigabit 2026) anjuran Jabatan Pembangunan Wanita (JPW) dimana inisiatif ini merupakan salah satu usaha strategik yang signifikan untuk memperkasa wanita dalam bidang ekonomi digital, teknologi dan keusahawanan.

Untuk makluman semua, perkembangan teknologi seperti Kecerdasan Buatan (AI), ekonomi gig, analitik data dan perdagangan elektronik telah membuka peluang baharu kepada wanita untuk menyertai ekonomi digital sebagai usahawan, profesional teknologi dan pencipta kandungan.

Seiring dengan perkembangan ini, pemerdayaan wanita melalui peningkatan kemahiran digital, literasi teknologi dan keyakinan diri perlu terus diperkukuh agar mereka mampu memanfaatkan peluang yang tersedia, meningkatkan pendapatan serta menyumbang kepada pembangunan ekonomi negara yang lebih inklusif dan mampan.

Jabatan Perangkaan Malaysia pada Mei 2026 melaporkan kadar penyertaan tenaga buruh wanita sebanyak 57.3 peratus, berbanding 82.9 peratus bagi lelaki. Jurang ini jelas menunjukkan bahawa masih

terdapat ruang yang signifikan untuk meningkatkan penyertaan wanita dalam ekonomi negara, khususnya melalui penyediaan peluang pekerjaan yang fleksibel, pemerkasaan keusahawanan digital dan penyertaan dalam ekonomi gig.

Selaras dengan aspirasi Dasar Wanita Negara dan Pelan Tindakan Pembangunan Wanita 2025-2030, Kementerian Pembangunan Wanita, Keluarga dan Masyarakat (KPWKM) melalui JPW terus komited dalam usaha meningkatkan penyertaan wanita dalam ekonomi , khususnya melalui pelaksanaan program pembangunan kapasiti, latihan kemahiran dan pemerkasaan digital.

Akhir kata, saya meletakkan harapan agar semua peserta dapat manfaat dari Program Wanita GIG *and Business In Technology* (GIG@BIT) ini dari segi ilmu pengetahuan yang dipelajari sebagai pemangkin untuk meningkatkan kemahiran, membina keyakinan, meneroka peluang baharu, menjana pendapatan serta memperluas potensi diri demi menyumbang kepada pembangunan keluarga, masyarakat dan negara.

Terima Kasih

YB LIM HUI YING
TIMBALAN MENTERI PEMBANGUNAN WANITA
KELUARGA DAN MASYARAKAT
28 JULAI 2026